

四庫全書

集部

欽定四庫全書

石倉歷代詩選卷四百二十三

明 曹學佺 編

明詩次集五十七

林廷玉

感遇

泛泛木蘭舟  
行行采蘿去  
放歌汗漫遊  
雲深忽迷清偶  
爾窮河源言  
晤弄校女睞  
此會際難相看  
兩無語翛然

剛風發塵寰杳何許

塞上曲

棄親來從軍誰無樹功心激昂在將帥賞罰貴必謹千  
金買馬骨龍媒歲三臨將軍重壯士誰道無孟任師行  
失紀律安能制敵侵不見南陽叟七縱還七擒

擬古

秋蟲鳴唧唧春鳥鳴喈喈言念瞬息間時序或睽乖感  
此時物變悠然興我懷佳人豈云遠瞻顧江之涯涉江

采杜若攜手欲與偕飄忽杳如夢愁心難自排

又

秋月流清光秋風吹妾裳今夕知何夕幸然登君堂君  
在燕山陬妾在湘水傍詎期會晤間遂茲吸蘭芳感君  
知遇竒感君恩愛長閨風有佳趣願言同瞻望

有感

重華光大厯九五飛潛龍綱維不振肅四海謳歌同甄  
函出通明暢達天下聰百川東注海細大咸納容我恧

沾青瑣不能振英風侃侃盛時彥論列爭長雄苟有利國家何必皆已功

林泉夏日遣興

長松覆雲蓋蒲葉青以舒晴光浮簾櫳曉日涵牕虛空  
中罕人跡數鳥鳴庭除軒冕豈不貴耽此山野居三十  
功名路夢境多憂虞偶得塵鞅脫方寸乃裕如山翁隔  
竹籬酒熟招我胥團團白玉盤滿貯菖蒲道一醉忘身  
世寧復論其餘

又

雲山閣囂喧野興自孤遠林幽歲月閒萬物無拘管猿  
鶴隨往來鹿飽卧町畇蹲鷗受水肥竹萌茁林短野老  
共清談蟹眼入茗椀松風晚生涼皓月冰輪滿自比無  
懷民一笑得仰俯

西堂雜詠次林世增隱君韻其一草履

淳朴苟得趣貢飾奚能倫菅蒯擗為屨飛雲誰復論朝  
踏清溪瀆暮拖歸雲村或時禮縫掖寧能知雁門松塢

徐徐蹈旋辟譚羲軒墮指步雪中不煦東方睂捆以給  
饔餐何慕鮮釀昏嗟嗟無懷民俯仰俱忘言靡麗俗所  
尚質素乃本源賢者敦澆漓風軌凜恒存

考槃清詠

卜築依雲山花開花還落野猿摘木實渴鹿飲泉壑幽  
鳥日嚶嚶蛛網懸屋角絲爪上牆顛雀瓢蔓林薄忽瞻  
山之陽蹠蹠翥雲鶴萬物遂其生吾心亦云若空山無  
侶伴呼酒獨自酌

又

青樓誰家子紫駒黃金絡雲霄飛意氣千金重然諾羅  
衣青岑醴翠金駝峰濯檀板金叵羅筭看紅雨落盈虛  
天道明世事反今昨一朝時勢異頓然成蕭索

秋日感興

風塵嗟湏洞誰能驅三蟲乘桴涉溟渤滄波杳難窮念  
此青鬢髮忽為霜雪叢安得從化人駕虬遊長空

再至定林寺

白雲鎖禪關  
松花落如雨  
佳木翳繁陰  
林深不知暑老  
衲卧雲間雪顛  
能梵語吁嗟  
住廬社遠公亦何許

感興

風林振孤響  
疎柳鳴寒蟬  
渺渺羈旅懷  
對此秋日光絕  
塞有行役  
寒衣誰寄將

林泉撥悶

屋上覆蒼松  
階前茂瑤草  
柴門繫釣船  
野徑啼幽鳥  
山翁睡起遲  
落花紅不埽

又

雲水涵虛牕往來浮野馬紫芝青巖上採之動盈把漁  
艇晚歸來繫在柴門下

書秋

庭樹凋西風落葉幾片寒蛩四壁吟雲端有歸雁萬  
境覺蕭森俄感時物變

宿靈寶

淅淅西風砧數杵天外賓鴻望南渚山川蕭索暮雲低

野樹離離帶殘雨鷓鴣暫借一枝棲迢遞關河情萬縷

清溪

清溪水邊人唱歌千花萬花森相摩陌上行人詫相見  
欲行不行無奈何鶯忙蝶亂競穿掠年年惟願春相若  
天道陰晴那可知但恐妬花風雨惡

鶗啼

千古哀哀望帝魂離人枕畔不堪聞梨花枝上三更月  
幾點猩紅漬血痕天津橋上君須記叫得春歸花滿地

何當化作卷阿儔噦噦德音鳴治世

閨鄉秋夜

枕簟涼生秋夜清風吹庭樹動秋聲碧空萬里湛如水  
月色滿天牕外明孤館蕭蕭靜如許何處殘砧聞數杵  
風情月思共撩人一種幽懷對誰語

臨潼懷古

驪山之水溫且清朝元閣上空月明玉環化作馬嵬草  
碧樹蕭蕭猿夜聲朝代興亡容易變今人不見古人面

踰林落落掛斜暉金井梧桐秋幾片

昔宋歐陽公雪中會客出令賦詩禁體物語

因追和其韻以寄興云

六出開殘天上華  
纊紛四海推林薄  
戍夫絕塞苦宵征  
行旅長途艱早作  
能令寰宇盡迷茫  
解使乾坤頓恢廓  
倚山莫道自堅牢  
觸日應須謾銷鑠  
條來忽去逐風顛  
蒙頭拂面漫空落  
偶然颯刺到牕紗  
遠爾嚴凝透狐貉  
騷人筆底任品題  
兒童階下隨搏攫  
凌晨艱食啼乳鴉

向晚迷巢飛凍雀釣磯蓑蓑響簾衣石徑霏霏滑櫟屬  
莫為今朝凜冽愁可卜來年豐稔樂夙成體魄自不繙  
天然襟度何須渝橫縱無計抑松篁緯繡只宜飛朔漠  
頓足應思就火爐僵手那能事旗槊千年詩令仰前規  
呵凍揮毫為吟噱

出塞行次韻

九天百萬來雄貔黃金詔下飛龍墀雷轟雷掣草澤震  
旌旗閃閃搖赤螭妖魔聞風盡潛窟耿耿櫬槍頓看沒

彎弧時落雲中鵠寶劒凌霜常逸發忽驚極澗飲垂虹  
殺氣赫赫摩層穹不戰屈人兵法奇羣醜那得逃術中  
阿香飛車騰赤電千古人傳青海箭天厨穀美內醞良  
將軍醉下舍元殿來者勿拒去勿追邊疆金鐵皆閑陴  
綱紀修明儲蓄廣王者之守在四夷虎皮多少包戈鎧  
丈夫事業史編載君聖臣賢世道昌會見名王皆欵塞

和西涯雨中韻

一雨連三日涼生枕簟秋同雲低隴樹遠水接江樓浪

跡慙飄泊浮名苦繫留不眠憂稼穡深願恐難酬

齊居次韻

齊居嚴禮祀燈火坐更深聖德通天道春光眷物情百  
僚遵戒誓三宿致精明上下期昭格寰區願順成

月次東坡韻

客中良夜月恍若故鄉明玉鏡光隨滿銀河影共橫多  
情邀我飲故意伴人行天際清如水依稀見五城

錦衣獄卧病

落魄嬰三木乾坤此病翁壁窓看皎月移榻避斜風愁  
陣攻頭白燈光照眼紅蓬萊天咫尺無路可相通

寓程鄉

羈懷隨處遣佳興入春幽柳院鶯聲滑江城樹色浮暮  
雨和雲暗春風得日收間間知富庶但恐苦徵求

建溪道中

何處秦關杳扁舟日夜程雲低江樹合水漲石磯平帆  
挂秋風影蓬敲夜雨聲天無南北雁何以慰羈情

秋日漫興

粵國風光好秋來興味饒雨添陂澤水風漲海門潮暑退塵襟滌霜清瘴氣消幾回閒拄杖高咏過溪橋

別王子衡侍御次韻

客裏仍為別鶯啼似欲留柳牽烟縷恨花帶雨容愁野樹雲千里江天水一樓何時定携手重上郢君舟

次廖師賢進士十日再登烏石山韻

烏山還命酒兀坐對奇峰遇節須行樂尋幽莫厭重寺

深松竹護碑古蘚苔封自把犁鋤足清時學老農

林泉雜詠

六十餘年夢塵寰萬事非蒼松環我屋黃蝶上人衣巖  
薛牽風細江梅得雨肥花前且命酒清詠對斜暉

又

遠雁依萑渚危檣度曉風人行江路上春在鳥聲中烟  
雨來天北雲霞絢海東草衣陶靖節揩眼看花紅

郊望

曉起望郊坰春烟幾抹青海船來港汎野鷺下溪汀林  
麓枝巢鵠陂塘水漫萍漁歌依古岸人在隔江聽

泉石野音

謝事歸來早深居遠是非雁銜秋色到鴉帶夕陽歸水  
落江形瘦山高樹影微行藏宜任理與願不相違

聖節朝賀

一曲鈞天侑九霞長生歲歲慶官家黃金鳩鵠迷雲氣  
白玉芙蓉駐露華燭影旌旗此偃蹇星明劒佩蟠橫斜

南山願效詩人祝禊線深懸荷寵嘉

遊圓林寺次韻

蘿薜門深晝亦關紅塵何路到空山高超瀛海三千界  
遠隔巫峰十二寰黃菊有情留客醉白雲無事伴僧閒  
浮名衰鬢成遷逐無補清時每汗顏

正德丁卯十月十七日寓恩平行臺

凱還當日費經營三十餘年得太平到處金旗閒夜月  
誰家砧杵送秋聲黃茅瘴起浮巖碧海潮來遙近城

最是一般寥落甚晚風疎雨逗羈情

黃田道中

陣陣西風吹客舟葛衣清真暑初收青山兩岸半含雨  
綠樹一江都未秋湖海每憑辰北望歲華無奈水東流  
行藏寂寞頻看鏡勲業何時願始酬

淮安即事

淮水湯湯不盡頭金城雄峙水安流帆檣晚趁人煙岸  
鴻雁冬依亂荻洲桂館連雲迷望景鳳簫吹月藹高樓

西風拂拂寒光薄到處朱簾不上鉤

無題次劉欽謨韻

簾櫳搖曳五更風起看長庚已在東楊柳暮煙隋別館梧桐夜雨漢離宮雲低伏枕愁梳綠塵滿香奩懶傳紅又是一春虛負却幾聲啼鳥夕陽中

沙溪道中

阿愴日日醉仙螺春興悵惘可奈何水漫溪橋分綠遠鳥來山塢落紅多東風吹柳干村靜麗日行天六幕和

老我得歸塵慮息也隨樵叟學山歌

正德辛未八月曾宿大安有詩糊粘於壁今次

其韻

松陰滿地晝庭空高卷朱簾許燕通旅興總歸山色外  
春光半在鳥聲中苔荒石逕千家雨花落瑤階幾樹紅  
峭壁四時煙不斷却因何事歎飄蓬

秋興

襟榆快爽得餘涼深覺草蘆興味長歸雁遠投江菼暮

釣船清帶渚蘭香風高海國榕猶綠秋盡家園橘漸黃  
村酒醒來還更醉却嫌風月惹人狂

山莊秋興

晴峰曉帶鷓鴣斑碧海茫茫咫尺間夜雨燈前孤影在  
秋風江上幾人還滿償暮景道遙願參透塵寰夢覺關  
天外浮雲隨手變青山常伴野翁閒

和步出西華韻

晴波東注遠官坊垂柳依依半負牆鶯語巧含春雨膩

燕泥清帶落花香浮萍密藻還相礙水鴨沙鷗兩不妨  
緩步却疑非世界蓬萊仙境屬吾皇

和東彭敷五韻

闕

又新年獨對寒燈思悄然宦跡豈能隨事好  
鬢華應不為人憐星躔遙與宮壺應河漢還同禁署連  
幾度詩成仍未寫也應羞澀到君前

謁文丞相祠

國破兵如萬蟻屯捐軀猶欲正乾坤千年廟貌含生氣

萬古綱常寄斷魂苔襯白雲封石刻柏施寒雨障祠門  
陳詞跪灑汎瀾淚天地酸心日月昏

送毛斷事考績還南越

燕山越水望悠悠課最承恩別鳳樓身世流年雙短鬢  
江湖宦跡一虛舟孤帆細雨黃塘路紅樹清霜玉硖秋  
聞說石門碑未朽憑誰千載企前修

和杜少陵秋興

野寺鐘聲晚出林誰家蘿竹翠森森蒹葭清澤天無暑

促織堂帷月有陰旅雁銜書秦樹杪漁翁鼓枻越江心  
長門深鎖黃昏靜無奈西風送遠砧

其二

疎林落落挂斜暉鳥外青山一髮微碧石樹未凋蟬已老  
黃蘆纔起雁初飛千頭園橘家相近十畝湖田願不違  
社鼓彭彭村酒美農家歡慶稻梁肥

其三

釣船搖曳水西頭午夜風生枕上秋越水芙蓉知隱意

灞橋楊柳逗鶯愁青松庭畔年巢鶴紅蓼灘邊午睡鷗  
白面書生翻自笑曾持三尺奠神州

傷秋

鶗鴂聲聲若有聞楚絃清切憶湘君愁潘鬢髮蒼多少  
病沈腰肢瘦幾分笑菊滿園秋競媚烏鵲投樹晚成羣  
傷心最是東流水千古無情送夕曛

傷春

坐對青山獨閉門悶懷無語麌青樽蘭膏芬馥將誰贈

鶴影伶仃僅自存兩鬢星霜餘白髮四山烟雨鎖黃昏  
紅飛綠暗鶯聲急回首天涯欲斷魂

遊春

日暖風香酒再携踏春行到亂花蹊滿坡細草留人坐  
到處新鶯逗馬嘶野逕天低雲在地湖塘雨過水平堤  
玉山歌仄君休論明日陰晴事不知

春水

溶溶灑灑鏡湖天湖上晴光映曉烟流盡落花還幾許

浮平遠樹欲無邊碧桃浪暖嘉魚出杜若汀香野鷺眠  
欲泛蘭舟和月唱却疑身在武陵源

春閨

落花飛絮擁重門嚦嚦啼鶯繞內垣羅幕已開天未曉  
珠瓔再整日初暄簾櫳夕照金蟬彈庭院東風寶篆溫  
雁阻衡陽書不到可堪惆悵對黃昏

夏仲

熟梅天氣雨霏霏山館清涼尚夾衣蝶亂叢沿逕見

鴛鴦幾對傍湖飛綠槐團影當庭院青草和烟上釣磯

一枕睡餘天正午梁間雙燕啞離歸

避暑

無奈炎威侵我急閒來掃跡遁虛空松亭況遇連朝雨  
竹塢清涵一榻風汨汨流泉巖石上叢叢芳桂野山中  
煩襟終日憑驅遣欹枕難禁午睡濃

中秋

八月今朝十五日烟霞病叟有遐思九秋到此平分處

百歲于吾強半時好月照懷何皎皎西風吹鬢且絲絲  
生平骯髒知何處且對清光酌一卮

班竹杖

八尺筇身少帶根常扶野老出山村却憐楚玉新裁製  
猶染湘姬舊淚痕天祿藜然烟已息葛陂龍化跡空存  
楊義夢斷無消息九節人間恐漫論

藕花

若耶溪上起微波撲撲清香陣陣過蒼玉折殘春墮梗

碎珠吹散曉翻荷飄搖遠助湘舟楫蕩漾輕傳漢女歌  
菡萏正開天未暑一樽相對竟如何

海棠

道是花仙却艷粧誰云梅聘可相方春雨着來真有色  
東風吹盡不聞香廢吟杜老牽情重睡足楊妃惹恨長  
嬌艷若將閒比論風流還合讓花王

邊城角

夜夜榆關索莫聲西風吹散不勝情將軍雉堞龍蛇動

壯騎陰山感栗鳴月色淒涼寒共到雁聲嘹唳慘相并  
離鸞絕谷知多少願得君王念遠征

老將

摧鋒破敵手揮戈豐鎬渾如馬伏波牙帳連雲屯朔漠  
金笳吹月度關河謀謨久練兵機熟危險曾經戰陣多  
爭却狼烟人樂業沙場閒唱太平歌

南浦

章江江上暮雲深南楚風光自古今水上夕陽鷗泛泛

山邊夏日樹陰陰滕王閣廢名空在孺子亭高迹未沈  
依舊封疆人事異不禁惆悵動長吟

西湖

四面山光映水光芙蓉到處送風香笙歌盡舫無虛日  
鷗鷺蒼波自夕陽衰草尚含吳慘淡啼鶯空抱宋悲傷  
看來風景真如畫那得山邊築草堂

處士

松竹蒼蒼映晚霞亂雲堆裏有人家悶臨溪畔看流水

閒坐庭前數落花日麗鶯聲當戶巧風柔燕影掠簷斜  
幾番勾漏閒尋問欲覓刀圭靜養砂

山人

雲谷深深是我家藤蘿松檜亂交加竹萌蒲蒻供賓客  
白飯黃蠶度歲華雨過自鋤園裏芋春前閒採隴邊茶  
青山夕照柴門靜芳樹聲聲自聽鴉

公子

廬叔相傳富貴身耕桑誰識世艱辛叵羅酣笑花溪午

叱撥閒遊柳陌春翠箔光騰金孔雀錦袍香蹴繡麒麟  
薛濤絳燭歌喉婉祗恐幽歡解泥人

貧女

髻鬟輕綰亂雲香每日寒牕按繡牀祇把心腸看寶女  
羞將顏色說何郎閒拈彩筆描鸞鳥笑對茅簷浣布裳  
三月韶光容易過却憐鶯藏苦飛忙

夜宴觀妓

絳燭光燒醉綺筵笙歌聲裏列瓊仙雲鬟高擁橫肩黛

金鳳斜飛蟬鬢繡幕香騰珠的歷錦屏花笑月嬋娟  
何戡却念難長在當日劉郎恐寓言

安貧

一座青山半畝牆松花滿地蘚蒼蒼蕨芽嫩漂陶盆水  
菰米香浮石鼎湯容膝數椽茅草屋華身幾襲芰荷裳  
頭顱霜雪心和樂日對風花入醉鄉

驪山

花萼樓前百和香伊川曲譜教寧王朝元閣在含秋雨

天寶泉深帶夕陽瀟水滔滔人共渡秦坑落落草窯荒  
前朝舊事知多少都付邯鄲夢一場

靈巖寺

館娃宮變作禪扉當日吳王迹已非松塢尚存麋鹿在  
草坡空有鷗鴟飛硯山夜靜鐘千杵澤水秋深碧四圍  
紅日西沈鴉正宿村前常見一僧歸

凌敵臺

落落當途南宋臺行人過此重徘徊棹歌古渡寒潮落

炎老荒洲白雁回  
粉黛盡隨花幻變  
青山空鎖雨崔嵬  
偏安事業能多少  
却愛般遊壯志摧

叢臺

叢臺之上烏夜啼  
叢臺之下草淒淒  
趙王已去叢臺在  
行人路上空栖栖  
碧樹蟬鳴滹沱北  
黃雲雁度玉屋西  
興亡千古盧生夢  
芳草斜陽望眼迷

漫興

把酒對芳春  
風花能幾度  
殷勤勸美人  
竊恐春遲暮

林下雜詠

碧草含朝露衰楊美午風門前一溪水流過澗橋東  
高樹秋風急踈林夕照斜柴門臨水岸幾簇拒霜花

泉石野音

小犬吠林顛鶯啼曲檻前山深人少到日擁野雲眠

石倉歷代詩選卷四百二十三

欽定四庫全書

石倉歷代詩選卷四百二十四

明 曹學佺 編

明詩次集五十八

呂 憲

弘治改元有感

我生正統末十九年天闔尚倚大臣子深承憲皇恩供奉餘二紀典牧滁山原曷憂去國遠抱此涓埃存奈何

及四十日覩四改元有鬢鬢早潘皓無間踏丘言今上挺  
神聖百靈聿駿奔華夷仰恭儉文景不足論鄙夫分荒  
野喜氣獨飛翻昨宵飽甘雨年甦潤其根太平固多象  
風謠亦騰誼北望華蓋逼不知在山村頃已約僚屬具  
榦待晴暾古寺動春色梅花瑩而溫一杯皆帝力詎望  
猶高騫河鼠志克腹犧牛羨孤豚由來過止足必腄羝  
羊藩但願賢路闢宗社等乾坤三復古人訓常安逮子  
孫

喜雨

諸公薄雨而應喜甚沈司空時暘先作喜雨詩二首倪太宰和之示余邀和余乃次韻答之

頃從宮闈災四方紛沴盜至尊減膳頻遠貢罷蛤𧔗舊京亦告旱春芳鬱如掩羣公走祠禱而我病床榻鬢憂日益星心齋戶常闔孰云蒼蒼高有感響斯谷俄然發輕雷鍾山遂雲合天瓢駿影亂樂部蛙聲閣喜來不暇卧起整頭上直勿藥謝携扶僦屋志苦蓋晨趨太常園嘉蔬青紫雜望望長千里溟濛暗金塔昨蒙示新篇乾

鵲噪三匝博哉武庫陳足以啓衰颯翻思情惱人花時  
猶雜還高軒以予從休衙待誰拉吟多恐費簣屐敗將  
重蠟糟妻頗解事香醪出雙榼

其二

青春滋物初滿衣霍與塙農家大小陂暴露及螺蛤鳴  
呼生理微萌甲幾焚燔城中億萬戶戶供龍君榻司存  
下令嚴層肆經旬闔厚祿不先憂主恩何以答事真倚  
伏殷誠乃天人合維我太宰公隆望本黃閣忠義發面

顏叩神免其匱頓回雲漢傷歡聲周白蓋區區蜥蜴謠  
兒童浪喧雜如麻雨腳來不見城南塔嗟余蒲柳軀兩  
覩星霜匝詩陳豐年象庶足慰蕭颯因之紀公德獨未  
厭紛還公生誠嶽降人可強排拉才難不其然宵吟對  
殘蟾借坡喜雨文賀公以携榼

送蔣惟深叅議江西

遡江風帆平指日陟滕閣回首石城隅離筵便成昨識  
君餘十年渾不露銛鍔其外每閭閻而內加榆約豈惟

銓司良家食心傾藿茲當參藩初胡可尋常度夏侯飽  
經術訓誥精壘壘彼俗楚乃佻猶未殷民惡胸蟠保釐  
說炳若青與擢以之著行事鋪張自宏廓善治減征徭  
好古訪淪落堂堂瑚璫姿終焉清廟託况今不次徵方  
面跡聯絡捨此來群疑謂未堪盤錯徽花映官僚寅恭  
相畫諾同急蒼生憂同後天下樂吾衰一繫匏念及書  
頻作母令金玉音慰我門羅雀強顏滯周南宦情已秋  
薄

上已次沈時賜司空韻

浮生百年內多憂曾幾酣欣物向榮無若春風覃石  
城霑新雨鍾阜藹晴嵐山川豈洛中豐鎬在江南地勝  
號佳麗天光增蔚藍繁花維玉驅柔桑育金蠶聽歌緩  
緩歸嘵此頭上簪犧牛與腐鼠莊周發余慚

其二

幾番花信歇日午方眠酣性從中歲懶卷帙罷研覃休  
衡羅可張香爐生碧嵐起得司空篇其音追雅南春光

入手畫銀鈎滿雲藍我句蛛絲微適用安如蠶小山叢  
桂招因公聚華簪誓將歸歟咏一洗平生慚

謝包武庫過訪

官廬帶寒照多病少所親不速肯余過眷然意何真偶  
儲五斗秫釀酒清且醇竊祿本非薄鷄黍敢辭貧休衙  
掃吏跡高論屏囂塵追遊益三紀而况葭莩姻亦知慰  
留滯觴酌許頻頻相看總無家携稚各二人溫恭仰子  
德問學老而新子不日遷秩予當謝簪紳但愧歲年邁

有負報恩身去去勿復道世路方荆榛

題芙蓉和楊循吉禮部作

亭亭綴高紅氣毓金天朗無言妙容華對者意弘敞涼  
颺久矣至固絕趨炎想色傾南國殊石帶西山爽輕雲  
動素波疑渡銀河響及含沆瀣餘宛若仙人掌我行忽  
見之褰裳欲孤往恨無華堂奉寵以金餅養過時而覈  
零委頓均草莽才難歲易徂憂來倚書幌

賀姑蘇李太僕少卿致仕

自公倡高節士以退為榮我何此拘滯尚惑兒女情方圓動齟齬固恥君子爭歷歲年晚徘徊恐無成駕言登山望吳會蒼烟橫縹渺但一氣孰辨三江清故里况凋落伊人餒躬耕所貴意則遠咀道吐華英莫以極鐘鼎來世方垂名誓將逐夫子因採紫芝莖

子昂竹石

吳興本天人其生面如玉先輩許經綸多才不一足詎談毫素間蕭條數枝竹因之異代下落月想華屋今夫

拳石微勢壓管簷  
當谷秋雲薄古黛山雨弄新綠飄飄逐  
仙氣把玩能醫俗如奏子喬笙乃在綠山曲如含英皇  
淚猶懷帝魂哭昔也殷士敏裸將痛侯服故爾生不辰  
吁嗟此公族

送王德輔奏事京師

德輔南京  
車駕主事

論交淺與深何在相逢早此心倘未宣比鄰或空老我家本盧鄉君來從鳥道俱生正統末宦學余草草前霜數年祿政拙陽城考不遇舍驪黃中腸曷傾倒蕭蕭如

病柏冰霜但能保巍巍奏高山子去琴安抱西成江漲  
平北駕風烟浩此惟謁帝宸重門森翠葆同年戚駕騫  
游揚互稱好環滁鄉月秋休衙迹如掃棄擲扶桑鞭西  
榆日增皓惻君情欠佳以未添丁惱明年充賀賓金陵  
拜丘嫂

雷

仲冬尚御祫園野報花開終朝虹且見南山殷其雷江  
城地回暖時序詎宜哉真宰意難料故老多驚猜我生

頭已白更事聊亦該末路慚齟齬衆哂同樗材如何九  
折坂我馬方虺隤三年別妻子何由舒好懷已矣勿復  
道黯然心獨哀移文幸母誚猿鶴期歸來

釣魚圖

楓香倚青壁魚樂芙蓉長溪翁戴笠來舟穩撥蘭槳欲  
談世清濁無復三閭文極目盼流雲滄浪發孤響餘音  
遙空谷川綠平如掌呼翁不我應繫此尊鱸想

屋漏

時在  
涂陽

山州土疎陶瓦惡鼠竄鴉爭勤脫落去來廝吏更幾人  
况乃郊居遠城郭今春補葺聊預防我出經旬颶風作  
簷前老樹夜墮枝臍美妻孥免驚愕歸來未雨尚未虞  
豈意淋浪忽從昨斜風直注無處乾行坐都妨足常閤  
心同杜甫千廈悲迹異盧仝數間樂布衾盡濕自起薰  
書卷頻移煩束縛達人無入不自如內重容顏時妍約  
吾儕佐秩未云薄散地何曾庇民瘼去去憑誰薦稱鶴  
早歸亦有先廬託

太常牡丹

耳邊怪底成蜂衙  
官寺為有南園花  
寺之土脉接鍾阜  
厥壤上上肥無沙  
春風誰倡洛陽會  
秋浦獨任韓湘家  
支撑葦薄抵簾幕  
露重最愛低枝斜  
人云芍藥可近侍  
勃勃方努珊瑚芽  
損乎足者益兩翼  
散地固合多名葩  
大將詩壇逐鹿急  
受降未有呼韓耶  
預恐誼譯設酒史  
毛舉正辛毫釐差  
司敗司空皆少飲  
是日老頰猶生霞  
蘭亭修禊舞雩咏去千載後今非邪我狂手脚喜欲旋

僚佐禮數宜其加作意吾益徐料理醒酒且進諸公茶  
仙童忽奏步虛曲啄木慢攬黎園琶庵人罷祀來執炙  
小鮮適口何曾奢勸客稱能讓秋浦客起便走前門遮  
九十風光彈指頃莫教春遠又天涯

釣雪圖為文選喬希大題

寒波雪片霏霏雨老漁宿昔扁舟具龍伯宮前擲一絲  
細鱗縮項隨烟霧覓竿本解釣珊瑚俗情大笑何曾顧  
太平無事用鷹揚惡風白浪弓旌暮簑笠閒吟柳柳州

眼中枉費頻招呼我待明年春水時去逐桃花傍巖住

沈司空種蓮次韻

七澤根株故相抵峰房生意青青子江頭山積藕鮮船  
不及西湖甘且旨舊家裔出休文翁太華句有昌黎風  
興懷短壑駕長松官衙水閣裁芙蓉我得容臺塘一畝  
下礙葑蒲上高柳今年且賞東君花明年亦種西湖藕  
碧筩仰吸酒如川一吸三百青銅錢錢空酒盡猶卓然  
賦詩最愛晚涼天接蘿倒着還臨水冒家池去無多里

達觀懷抱何不容碌碌塵埃人似蟬

題陶九成湖石芙蓉圖

因歲魏都憲家

金飈剪刻明江水玉露淋漓半酣裏不勝秋色染裳衣  
遲莫天涯徒自喜昔人曾比五老峰看來峰石何曾似  
花自熒熒石齒齒村婦嬢眉向西子故多繡褥艷豪門  
枝葉紛紜針線死青春誰共無泥滓只有中州魏家紫  
塞鴻社燕那停趾相慕容華各千里

題秋雁圖

黃蘆白沙千萬洲塞風卷雪無清秋江南水深足梁稻  
棲息未暇虞羅憂一雙驚飛為誰起呼曹亂叫烟波裏  
就中亦復半無聲夢遠三湘憶春水

治河謠

古河徙從周定王漢悲瓠子歌宣防後來紛紛獻群策  
神禹遠矣誰其良黃流一石泥數斗倏忽風霾千里走  
奔派力障勢轉狂似止兒啼掩其口古之使者猶為民  
以身捍水勇且仁今之使者志在名流移未復碑先成

張秋已誇纘禹績符離廟享又無敵君不見蜀之遺愛  
仰三犀今之鐵牛仆在隄

滁陽對雪用杜韻

臘近都稱瑞民貧益解紛自然生喜氣不厭對寒雲舞  
馬隨風亂遊蠶得葉聞爐頭新酒價一問卓文君

其二

野雪迷深巷山亭望醉翁欹斜臨澗竹歷亂遙簷風肩  
聳詩成瘦顏衰酒與紅客來從我臘歡洽愧囊空

天寒夜卧

雨久當成雪天寒不肯明君親南北夢城闕短長更有  
病官何物無聞老此生茅茨蓋新屋妻子念歸情

弔文山遺墨

錢世恒家昔藏有文丞相六歌及與其妹決  
別赴死之書內丁寧女妾一一詳盡乃墨跡  
也往時吳狀元匏菴見而愛之為錄其書於  
家以六歌文山集中自有不錄居無何而世  
恒家失火六歌與書墨跡無一存者世恒恨  
不已匏菴乃出向錄書稿與世恒作楷字書  
之而中書姜廷憲題其卷曰弔  
文山遺墨予為賦五言一律云

有形知有化無愧仰無窮書與家人絕身隨國步終大  
名寰宇滿至寶刼灰同載簡文山集篇篇墮淚中

除夕用杜少陵韻答包甥忠

官寺不携家疎梅向我花達生從塞馬知倦愧昏鴉臘  
謝春光逼寅當斗柄斜屠蘇不成醉歸夢遙天涯

其二

龜蒙茶竈具太白酒船圖雨氣能消暑秋容已滿湖稻  
香農望足僧定梵音無一味來詩意招要實有孤

送寺丞文宗儒考滿十八韻

明堂非一木得地是良材公豈尋常輩元無寸朽猜云  
何於匠氏乃置此山隈憶自煩花縣徵行且栢臺青蠂  
多浸潤赤驥頓徘徊僕御憐丞負官僚喜爾來仁言恒  
利博吏飾以儒該古直梅仙似精忠信國培賦高傷二  
鳥職舉致千駛奏績書應貳趨朝轂共推風雲當簡拔  
盤錯任剗裁星漢仙槎近蓂墀曉英開莫因高入步渾  
忘舊銜益憂鬢鷲驚衰醜遺經惜亂堆世家雖太史俸秩

假庸才恐老皆山郡羞同不雨雷塞翁明得失河上任  
遲回早晚三江去鱸魚覓四腮

徐氏古溪草堂

家在金溪住古溪今人知勝昔人迷未將門地誇江左  
已覺風流過瀼西一棹清寒歸後晚數峰連影向前低  
區區結網心長有何日鴛湖學穩棲

送方參議之浙藩

湖山開省壯東南君自司農拜少叅財賦獨憐西浙盡

民情先向舊都諳  
柳堤細浪樓船動  
蘋閣涼風畫棟含  
若到分司真卧治  
心同明月照江潭

寄汝調元勲

家貧就屋未安居  
已願閒官不願餘  
風靜精塵懸戶牖  
雨深荒菊卧階除  
因過鄉井心常切  
仗有親朋跡未疎  
安得銜杯如二妙  
招邀那復待巾車

送朱良弼應貢還

昔曾故國知名久  
我自今年會汝初  
海內奇才歸禹貢

篋中經術老闢雎晨辭魏闕鐘聲早暑退秦淮樹影疎  
歸去青山應不負傳家還有五車書

遊廬江治父寺

不有山農導我前寺藏幽谷到何緣人間舊歷將僧臘  
松上歌巢是鶴年大治空名餘劫火古泉清響落厨烟  
此來暫了公家事局促斜陽下嶺巔

寄應天尹泰志寧

我為公歌九歌魚眼中誰讀五車書名高京兆新遷地

官自承明舊直廬白髮獨憐狂走楚青山誰復夢環滁  
共誇藉藉如張趙歛跡豪強宜用鋤

寄劉克剛太守

不覺年過四十三馬曹偏處菲才堪愁無却老青精飯  
夢有藏書白石庵鄉里衣冠誰晚節仙家顏色自春酣  
巾車早定歸來約常擬先生作指南

送少卿張彥質及丁侍御

張少卿彥質將會丁侍御浩然於江南北

印馬舊年丁曾會今不得親別詩併致云

不共花時一破顏送君長自掩柴關問官碌碌安知馬  
成癖悠悠為有山采石江頭看劒發歌風臺下賦詩還  
愧無春雁雙飛翼瞻望星軺莫重攀

送李都憲總督漕運

連檣入漕鄧林齊都運新恩下紫泥劉宴部分煩一日  
李冰開鑿鎮三犀衣冠曉餞秦淮道笳鼓春迎楚水隄  
獨羨飛騰遠感舊弱齡曾識掖垣西

送吳興沈文瑞視子金陵畢歸

文瑞本有德長者嘗任工部員

外郎被謫故官  
止漢陽太守

卧病空齋忽扣扉驚呼出處十年違平生失馬皆人厄  
老眼看雛作鳳飛草色青青淮水餞花時緩緩雪川歸  
浮名終是輸行樂白髮何曾減帶圍

答包舒菴

去天尺五仗雲層兵衛晨趨地位增宿望已歸佳士口  
苦吟那免俗人憎君今暫抱無家恨我亦同為有髮僧  
為和詩篇成不寐短窓殘月下疎櫺

題丹陽故孫處士山庄

蔓蔓束帛未霑恩喬木丹陽是慶門人遂頽波無返勢  
朋來宿草有啼痕收書東老神仙識食力南洲道義存  
甚欲留連亭上景乳烏哀切易黃昏

遊泰山次侍郎鄭東園韻

人在山腰若蟻微白雲常傍短筇飛廟多祈報香烟合  
春阻高寒草色稀地主只談三島事天妃端拱五銖衣  
豈知客是瀛洲老曾寵金蓮向北扉

其二

侍郎乘興自南畿社老村童覩漢儀浴日早明雲裏觀  
靈風不滿廟前旗古今詩句留鴻跡來往遊人似奕碁  
雖是亡秦多絕藝披榛還覓李斯碑

官舍秋晚有感

雨過鐘山挹晚涼芭蕉承月翠流光十年江上雁來往  
萬事眼中人短長獨在異鄉偏嗜酒老防多病每尋芳  
此卿敢道還清濁兀坐如僧一炷香

送張定菴尚書致仕還雲間

連章請老茲方遂帝寵公歸禮數優紫氣度歸周歲史赤松為約漢留侯堂開畫錦非行夜味美江鱸正及秋模範斯文歸晚節巍然砥柱見中流

送彭給事君實陞僉憲建寧兵備

海邦煙霧散冥冥長控東甌島嶼青對事補天曾捧日屯兵占使已隨星鷹鶠不展行臺肅雞犬相聞野戍寧看取武侯揮羽扇書生伐國也嘗經

上元南都儀鳳門外祭天妃畢有感

海不揚波職有神精虔祀典及初春江山傑構龍宮近  
珠翠明妝象服新落日官松消積雪華燈街鼓蹙香塵  
白頭潦倒休輕誚管領齊郎第一人

送崇信伯奉使還朝

伯今守備南京成國公婿成國留欵始識

開國風雲委慶長使還龍節正煌煌館甥初識汾陽第  
揖客能容沒黠狂甕裏葡萄浮大白廡中苜蓿飽飛黃  
朝廷一飯思頗牧忠孝母忘守四方

挽伏羌侯毛公

公起自百戶陞某官擊賊滿四中流矢沒於陣立廟甘州追封

伏羌  
侯

二十靈州擁勝兵四朝身任一長城中原每惜廉頗老  
西域猶尊定遠名日昃揮戈分大戰星芒隨矢墮前營  
堂堂追寵河山誓廟食丹青炳若生

送郎中劉之敷移病還海鹽

書札新承仲父招歸旌心曲已搖搖官衙瘦馬無餘粟  
海國魚鮮正脫潮畫謝鞭蒲醫藥便晚遊林竹酒樽遙

東山還為蒼生起老去過從未寂寥

賞牡丹

太常南園牡丹盛開一木百朵與吳學士夏銀臺同賞而作

百朵深紅葉葉承含情五出露華凝盛開有限春光老  
相對無言酒量增冷落官衙羅暫撤清平詞調客皆能  
何當一試仙人術別染黃金細作棟

憶桐江

連山不斷湧波濤察見溪鱗與澗毛漁戶業憑烏鬼活  
水春機舞雪輪高年光屢換奔如馬足力空餘健若猱

垂老追懷常在夢扁舟安得更遊遨

贈郭御史時予為言官所劾遂有歸志

弦歌猶自說松陵冠豸峩峩合見徵君子歲寒江左共  
野人秋色長賓間增動搖山岳無南北報答涓埃忘寢興  
忽憶青門瓜圃業思歸擊壤誦年登

送南京參贊機務上司馬致仕還公安

銅柱蠻烟掃穴空舊邦機務屬元功身能勇退儀刑遠  
詔涓難留禮數隆黃鶴舞仙江笛外赤萍如審楚謠中

踈狂我亦便歸去惆悵何年得會公

閏正兩遇元宵

閏餘重此上元宵兩度華燈不厭燒酒為競酷騰舊價  
俗工談謠鬪新條百年萬事都行素一刻千金也自消  
老逐兒嬉從指笑醉歸那復記趨朝

六十有感

生向平城擾擾時太平遊宦得歸遲治聾社酒分鄰父  
含笑山花作侍兒樽節力田那不足藏修委命復何疑

心知千古紛紜事僅抵明窓一局棋

片

土膏淑氣漸舒揚芽出鮮新半尺強生菜盤中春日薦  
青泥坊裏野人將水占此物知鳬暖巢帶餘香覺燕忙  
欲與晨暄同一獻鄉豪適口有蒸羊

喜雨

衆道西成望已無賴天時刻救焦枯雷行催滴將軍馬  
電笑疑投玉女壺新漲汪洋如素練晚荷傾瀉總明珠

老夫更為農家喜逐婦林鳩且未呼

湯汝威歸自海上示余以詩次韻答之

依依紅蓼帶蒼蒹秋老空山寒氣添野服閒行無障礙  
宵鐘淨土信莊嚴酒賒寺外停供茗芋剥盤中略點鹽  
前昨坐懷歸棹遠燈花晴雨為君占

池灣沈一之大雲姚惟誠兩生攜酒慶余生辰

一之云去歲壽長洲沈石田承有詩教今獨  
無言乎遂次石田韻作詩答之

五十年前祿重叨病來  
非銜乞身高一經門戶今空老  
二頃田廬半不毛  
風颶茶烟繁素鬢鮮乘梅雨上緋袍  
餘光潦倒貪杯酒  
適興詩篇謝與陶

竹坡

向陽不種邵平瓜  
長坂風披翠色斜  
好事有人常徑造  
食貧無肉也清嘉  
籬防屐齒傷新笋  
雨瀉灘聲走白沙  
誰掃鷺溪絹中墨  
為傳羣玉影交加

送譚秀水知龍州

譚蜀人  
諱溥

五馬難遮感邑人恩遷先已夢刀頻寄梅驛使今千里  
望蜀鄉關僅一旬湖水鴛鴦當別酒山城鸚鵡解調春  
斯民直道無南北更願吾侯撫字新

送海鹽秀雪江除僧會還邑寺之天寧

作詩為愛無僧氣捧檄其如有宦情鄉曲稍妨頻會晤  
海頭終是少逢迎欲從虛室分吾白管領方袍獨汝清  
遙夜潮音供靜聽一輪涼月掛高城

追和遊山韻

雨浥紅香濕未泥  
諸公有約去還齊  
慣途老馬逢高健  
欲飯村鷄送遠啼  
碧水丹山情不淺  
緋桃素李眼都迷  
同時恨不同清賞  
慚向金陵續舊題

題龍潭驛

繁紜壞道瀉鳴湍  
慘淡輕雲翳遠巒  
馬渡溪橋松葉暗  
蝶穿蘿落槿花殘  
正愁暑氣肩輿晚  
忽轉江風驛路寒  
十五年前尚通籍  
太常今去舊長安

鳬

十鳧同下四先飛淺水魚蝦食漸肥蘆葦有花菰有米

晨光秋色正熹微

嘉善四時竹枝詞

村巷依稀帶日斜高墳數尺是誰家晚來風送江頭笛

吹落棠梨一樹花



石倉歷代詩選卷四百二十四

欽定四庫全書

集部

石倉歷代詩選卷四百二十五至

詳校官編修臣謝振定

侍讀臣孫球覆勘

總校官進士臣朱 鈴

校對官中書臣汪學金

謄錄監生臣孔廣平

欽定四庫全書

石倉歷代詩選卷四百一十五

明 曹學佺 編

明詩次集五十九

王弼

送方石先生赴召分韻

憶昔拜公初我上南宮試開心念通家恩愛良獨至我  
領漂水除公返桃溪睡中間十餘年日月忽如遺昨日

會總亭再見若夢寐公顏已頽朱我鬢亦凋翠晤語必  
詩書談歡止茶鼓殷勤五日間頗見平生意公今捨我  
行折節從王事空嗟斥鶲情難附冥鴻翅秋風吹長江  
柳條作枯刺扳折苦不堪無因寄愁思

次吳少宰下邳見山韻

匏翁江南來清風遠相饋不見江南山跔躉嘆牆面過  
淮三百里無地作游衍忽逢下邳山開蓬延一見船進  
山亦來默若對酬獻欣然起題詩老氣何遒健至今開

卷看令人久嗟羨此翁風韻高豈諧時俗願

同一夔栗夫觀白太傅安穩眠次韻

秋霜無永茂春日無堅凍及今不為歡弔古徒自痛邯鄲夢榮華及醒果為用方有在夢中豈復知是夢

望前車

百草明朝霜霰冷如鐵驛日慘無光飈風何栗烈昨夜雞鳴時已與前車別不見車中人但見地上轍

古樂府二首

妾心若明月君心若流水流水清涓涓忽然波浪起人  
見月盈虧月光常不死

其二

妾心如秋露君心若春芳春芳宜不好頃刻委道旁露  
性本柔濕天寒結成霜

題陳待徵山水障

陳君作畫時墨落如灑水筆端元氣忽淋漓白者繁迴  
青者崎長虹飲澗瀑下走老虺桂枝藤半死突然盤據

十畝餘片石之大有如此戴笠而杖西者誰前疲欲僵  
後復起褐不掩脰屨無底入山不深猶不止我欲登此  
石招手從二士山中有谷谷有芝不用官倉五升米

贈龐生吹簫

寒星點點秋雲薄白日離離映寥廓哀商怨徵動高堂  
想見梧桐滿城落青年白皙吹者誰龐子風流妙音樂  
自從五月來長安久別吳湘舊江閣吳湘江上曾一吹  
江水江烟青漠漠孤舟婆婦不得眠四顧長風起蕭索

紅塵向來聽者稀鳳喉龍响如局鑰秋來見月苦思歸  
不覺悲涼指間作此曲本自仙家傳掠舟曾送西飛鶴  
燈昏夜靜初聽時小雨先來洗城郭明朝却上東坡船  
此地憶君成寂寞縱有新聲何處聽蘆花月暗楓橋泊

二馬圖為陳明之題

壯哉陳明之有此兩玉驄一驄色作葡萄錦一驄雪尾  
雲為鬃咄哉明之此非畫兩胡碧眼睛相射手中綠繩  
三尺捶人馬意態俱閒暇燕郊二月沙草春淡風艷日

開烟塵兩龍浴罷桃花水迴視八極生精神十年侍朝  
未央殿西北貢馬尋常見駿駘豈有仗下材空勞萬乘  
臨軒看有如此圖誠不空舉足萬里無山河試令放馳  
九折坂定與飛鶻爭先過神物不受人間役冥冥天意  
應相屬明朝卷軸送還君莫使春雷驚我屋

次栗夫韻答一夔招飲

聞君東籬把寒菊對酒高歌霜滿屋尋常閉門嗔索詩  
此時下筆皆神速想為悲秋發豪興十斗九空驚侍僕

不然浩蕩凌雲句豈是枯腸泥饋粥余時遠客范陽西  
土醞作酸那慣服廝舍冷落幸無花若使見花增感觸  
紛紛胥吏羅我前縱有清吟誰採錄興來只據小胡床  
仰視天際飛鴻逐今日歸來眼始開君有新詩盈卷軸  
况逢新條急卯酉何得抽書清案牘我觀官府束縛人  
雖有良驥無逸足君於世事常超然此意要足天下獨  
垣西往時花底尊何事猶煩致書促百年之內良可知  
日月如梭走相續看我面如秋葉黃愧君鬢似春條綠

嗟我茲行亦跬步節序何嘗異風俗如君此詩極可賞  
已自不及花前讀世故相尋恒萬端正似河沙難計解  
後來離別那可量風塵悠悠恨川陸我今作戒非為花  
十事九不如人欲古人嗜酒稱酒聖任渠嘲謗吾何辱

過半江菴觀鐵崖樂府花遊曲次韻

花氣作陰春晝濛蜻蜓鬪影蘭苕風鐵笛老仙石湖裏  
雪色長髯映湖水美人塞芳度水門硃紅藕絲新染裙  
蹋歌採採不成步歌聲下徹吳王墓蝶隨香花底來

白蓮掌上真珠杯清音震落碧瑤碗亂泉捲入銀星板  
老仙起舞山日西綠雲落筆留春題酒醒不見玉堂使  
簷竹敲風僧壁西松香濕透小銀箋風流盡付瓊瑤篇

賞廣東部梨花用東坡梅花韻

缺月掛在城南村百花黯慘無精魂  
開眼東闌一枝雪  
清光回晝寒燈昏  
牽衣昨夜走相覓  
風物雖好非吾園  
盤龍小榦破春夢  
主人顏色如花溫  
歸來展轉久不寐  
縞衣月淡扶桑暾  
今宵又作省中宿  
相思復欲來呼門

露華颺颺鬢鬚脚冷主人不出花無言明當掃拂花下石  
我欲徃置雙清尊

閭門謠

蘓州繁華天下聞蘓州繁華數閭門門外狹斜不容轂  
人聲雜沓洪濤翻大酒店小店如列柵南貨北貨山委積  
黃金論斛錢論車到此消磨水沉石丈羅綉緞成落機  
爛如春雲映日飛歲供上用苦不足連箱去作豪家衣  
小瓶裝酒滿瓶腹軟蒲作包細繩束千船萬船走湖海

京師不飲葡萄綠紅樓百尺翠柳遮中有絕艷如桃花  
琵琶箜篌聒天響郎醉不知西日斜高檣巨舸衝尾泊  
貴客豪商往來錯水夫收帆槌大鼓霹靂連聲飛火炮  
鴛針刺枕繡緣聯龍鬚編席青錦緣悅柔豐素瑩欺雪  
漆老遠光輕抹烟赤毫縛筆利戈戟繭紙鋪花呈五色  
合歡帳帶雙鸞騫官樣髻鬟雲一尺百需瓊碎何所無  
十萬纏腰到處娛夜闌酒醒人已散隔浦還歌山鷓鴣

昭君怨

明妃掩袂辭青鎖雨淚盈盈向空灑生來不省出羅幃  
萬里誰教學騎馬待罪長門歲已深朱顏綠鬢坐銷沈  
君王對面尚如此安有異域能知心一死可辨不足惜  
但念無名死何益未說黃雲出塞愁妾有甚難長在臆  
琵琶曲譜君勿傳薄命流落空自憐漢宮若奏房中樂  
自有關雎樛木篇

永豐謠

永豐圩接永寧鄉一畝官田八斗糧人家種田無厚薄

了得官租身即樂前年大水平斗門圩底禾苗沒半分  
里胥告灾縣官怒至今迫租如迫魂有田迫租未足怪  
盡將官田作民賣富家得田貧納租年年舊租結新債  
舊租了新租促更向城中賣黃犢一犢千文任時估價  
家算息不算母於乎有犢可賣君莫悲東隣賣犢兼賣  
兒但願有兒在我邊明年還得種官田

秋雨嘆

雨陰陰水漫漫十日復五日侵宵還達旦不愁階下蘭

蕙死但憂田中穀菽爛蘭蕙死君子以傷悲穀菽爛小人恒苦饑人饑稅轉逼因之生盜賊人饑稅逼盜不息於乎有粟吾焉食君不知六月南風河水枯日日中天行赤鳥

奉使保定諸公餞別屬予為倡

平居雅愛重九名西域乞花過東城眼中一壺又長滿花開萬事余不管詩情酒量雖不同冷淡竊比陶家風婦亦忍貧無許語手壓糟床響秋雨諸君來尋意畧重

舉杯浮白不相容屈指算我行色近只恐歸來花已盡  
我醉突兀如堵牆請君作歌歌襄陽

戲窓前小桃

小桃甚小能芬芳乃在主人廳柱傍忽然見此婉清揚  
使我廢書興衣裳去年柔弱風中狂樊姬癡小未解粧  
綠羅衫袂紅錦襍一笑伴我窓風涼一春寂寞卧桺楊  
花氣撲簾聞晝香水瓢竹格小匡床主人乃是江左王  
小桃小桃弗爾傷坐看明年廳柱長

遊趵突泉

濟南歷下多名泉白沙幾處涵風烟郭西趵突更神異  
平地一朵白玉蓮浪花滾起千層雪此中疑是蛟龍穴  
靈藏歲久變妖怪精氣上湧成涎沫餘波散漫淵復渟  
溪風冷冽山雨青微霜初下雁秋浴落月漸低猿夜聽  
窮源我欲遡川陸舊誌虛傳自王屋冥茫難測造化情  
聊寄泉亭漱寒玉

送楊儀曹養病歸東吳

楊君文如雪溪竹清圓瘦勁無不足筆牽萬牛又神速  
顧視餘子誠碌碌儀曹官好有拘束神駒受控翻局促  
以茲氣鬱不得舒三月卧床手捫腹我知君病乃非病  
兩度謁君呼起沫君言吾疾殊可怪合眼常見吳山綠  
即日上書謝至尊臣身頗類置中鹿得報忻然心自賀  
明珠出泥還故犢丈夫落落期千載不必紛紛空食粟

草堂對月分韻

明月轉西壁歌筵漸徙東一尊貧對客百事懶如翁雁

噉霜華外蟲棲露草中今年秋更好才得此歡同

送林新國還黃巖

曉寒開祖帳清雪映離觴為客年華盡還家道路長江  
山留賞玩鄉邑重衣裳想見吟邊興春湖共渺茫

遊靈巖謁杜清獻讀書處次方石先生韻

市塵江截斷山色雨添明地迴神靈會秋高水石清勝  
觀隨步改險息得林平一辨杜公室蹉跎愧此生

其二

白紝秋瀑勢青削晚峰層勝地雄千古私心盡一登莽  
深僧識路崖黑鬼藏燈激烈思前事憑高意氣增

發澄江

江水去悠悠三年兩命舟景繁添客恨老怯近鄉愁急  
槩催潮信回灣失埠頭海門春色好指點見台州

夜夢八叔父

長途望不極永夜泣相逢似為中年病全非舊日容自  
應扶几杖豈解情章縫覺後收餘淚鄉心一萬重

又賦金魚

早從江市乞魚秧，養得纖纖翠鬢長。  
稍覺波濤吹夜海，便驚風雨到秋堂。  
悠然不畏銀床近，伏處應貪石盎涼。  
此意分明魚是我，千年誰復問蒙莊。

中秋婁元善家賞月限韻二首

草堂秋半氣如冬，孤月飛來海上峯。  
興在據床知庾老，時經剥棗念幽農。  
露華拂曙驚仙鵠，河彩當空動玉龍。  
絕景此時真一快，豪吟還擬奮詩庸。

其二

白月當空桂影微玉樓高見素鸞飛涼雲已淨千峰影  
彩筆真生萬丈輝長嘯天風來客座半醒詩夢在僧扉  
清樽且放狂夫醉休說乘槎犯斗歸

古直新買雙菊

雙菊前叅似兩生鄙夫為爾眼增明招筵幾日煩詩侶  
晤對終宵絕宦情興至只呼紅麴酒坐來忘却紫尊羨  
清吟莫怪羅衣冷小雨飛時已二更

神樂道院分詠枸杞

簇簇紅霜映石壇  
高標留借野人看  
風光牽挽藤三尺  
秋色扶持竹半竿  
本草性涼消內熱  
仙家味苦帶儒酸  
向來肺為憂時渴  
欲臥籬根待一飧

送張兼素之師宗

一封何敢犯龍鱗  
欲乞清明恕直臣  
萬里又成嚴譴日  
百年同是畏途人  
休為太傅臨湘弔  
善保元城過嶺身  
麟鳳從來天下瑞  
未容魑魅久相親

齊宿荅楊質夫

到門初見暝鴉樓圍坐爐熏燭漸低不放酒船來問字  
空煩詩札送封題雪深西寺春齋集日出東華曉仗齊  
清興對君聊竟夕未應真向局中迷

分詠江令宅送屠元勲之南京

三朝丞相老詞臣淮水西邊舊卜鄰飄搖未妨青鬢好  
往來惟見碧山春花亭竹榭當時主牧雨樵烟異代人  
君過青溪應弔古好詩端為謝溪神

遊山限韻

清流垂蔭夾雙堤一曲滄浪野唱齊東寺日高微覺暑  
前村花落半成泥獨憐飲興經春渴休怪吟頭盡日低  
飯罷長廊還一笑匆匆又解遠公攜

送溫冬官使陝西

關西民庶委蒿萊鴻雁嗷嗷極可哀金幣屢從天府出  
旌旗正望地官來華陰山逼河聲轉函谷雞鳴樹色開  
隴蜀連封才咫尺使成應換綵衣回

送龍湖太守

龍湖太守擁旄旌西過  
牂牁是舊城從古衣冠非僻遠  
如今風氣亦文明梯航久已修  
唐貢帶礪還應講漢盟  
身率百蠻同稽首千年委質在周京

封御史強公挽詞

八十年來酒與詩倏然林下謝清時  
江山滿目藏舟改歲月無情弔鶴知人世空餘新涕淚賓筵無復舊威儀  
束芻空谷懷賢意千里應慚絮酒遲

送趙子厚宰上元

新為赤縣江南去舊是黃金榜裏人恩數不殊臺省例職司兼與吏民親地稱根本由來重戶切銖求最易貧知爾政成多逸興鳳凰臺草坐芳春

次韻陳一夔清明感懷

公詩常切故園悲不耐紅塵帽底吹上已風光依例好中年情況自家知勝遊準擬隨輕策貧具惟應有伏雌明日城東濯纓去平泉石上送青時

立秋夕同陳一夔宴坐限韻

執熱昏昏待得秋真如枯涸願清流眼明今夜能看客  
肺好明朝共出遊遂有微涼生几上忽驚虛賴落簷頭  
草堂早晚堪乘興升斗煩公為力謀

題桐菴居士

何處高棲王聘君一菴秋色淨竈氣青桐手種成嘉樹  
白首年來卧翠雲巢有鳳凰堪作侶材非梓漆謾同羣  
石床聽鼓南薰曲試斲霜皮製裂文

遊靈巖道中追賦

奇觀共說靈巖寺健步今登白石梯詩刻勝收唐以後  
禪關初啟晉之西屋連風雨成魚鼈地拓烟霞接虎蹄  
神秀千年完不改異泉佳竹滿陵溪

次韻方石先生秋夜感懷

潦倒乾坤此布袍白頭那減舊風騷孤燈寂寞閒聽雨  
千古英雄笑委蒿病後壯心秋草折夜深歸夢海天高  
相看獨幸青樽在無限幽情共一陶

挽王中舍允達

數行遺墨在瀕危臨訣從容語不支萬里此身真夢幻  
九原何處盡交期謝安欲卧誰相挽王式雖來事可知  
今日旅魂招不得匆匆翻恨出山時

裴師召晚翠堂

蕭然茅屋倚山開門外山光翠作堆動樹好風嵐忽散  
掀簾爽氣雪初來練裙醉墨池邊雨瘦竹青鞋石上苔  
幾度登高望城郭先生榻外即塵埃

常思嶺次韻

前人飛錫此為家無價烟霞不用賒  
伏虎峯高臨海月誦經樓迥接天花一林膩雨僧收筍兩腋清風客試茶  
欲着孤亭添勝槩先開蘿逕遼松斜

九日登望海門

望海門中望海門斷雲將雨暗千村  
峰巒露盡秋山瘦潮汐來時野水渾暫許  
餘閒偷白日翻憐造次有清尊  
菊花忙裏開還未試遣新詩問小園

出城

今晨不為閒遊出不為閒遊興亦嘉  
帶雨青山十餘里  
傍雲茅屋兩三家斷流已作方塘水  
舊雨猶殘半樹花  
欲借蘆根安釣石不知誰管碧溪沙

客中元日

賞心客裏有椒杯笑口雖慵也合開  
老減一年難再得  
春從此日又重來五旬已入稱翁例  
三命猶慚服政才  
身到天邊行未遠回瞻紫氣滿蓬萊

送陳冬官監稅蕪湖

割葵須解惜葵根誰說東南利有源六府廢來無國計  
一分寬處即君恩班行暫輶郎曹貴制置應誇使節尊  
到日江花正撩亂不妨先理舊吟樽

除夕

除夕年年不在家今年除夕在京華病依孤枕渾無寐  
靜看寒燈自結花五鬼不嫌窮面目一官堪笑拙生涯  
明朝拜舞辭青瑣又逐春風上海槎

瀑布泉

涓涓初見出蒙時  
到此瀾奔勢莫支  
月臼搗瓊千杵合  
天機裁帛萬絲垂  
清秋雨歇猿聽憒  
遙夜風高鶴睡遲  
獨恨餘波落平地  
成川又與濁流期

晚泊

邂逅峯陰一繫航  
綠莎鋪處小胡床  
人家半隱磯頭樹  
官路斜通竹外牆  
傍岸沙牛春帶犢  
隔溪雲碓夜春糧  
幽居此地如堪卜  
子美瀼西舊草堂

建溪席上次方石先生見憶韻

盤空硬語力移山滿地風雲叱咤間怯戰有心堅漢璧  
避追無計脫秦闕百年淮辭償詩債萬事何如老得閒  
滄海眼前真浩蕩野鴛終愧海鷗班

七月十五日宴集限韻

幾度狂來欲破牆風簾雲箔自相將草堂便許邀明月  
紈扇還來坐夜涼西苑樹遙微見影東隣荷近忽聞香  
芳辰偶得官中假倚席高歌曲未央

四月十四日德州官廨見薔薇盛開有感明日  
道間又聞鶯聲宛轉在樹陰中不勝淒惋賦  
此自遣

昨宵苦被薔薇惱金日重聞黃粟留飄轉客身殊未定  
闌珊春事不勝愁青林氣重迷征旆迥野風銛憶故裘  
傳節漸更家漸遠無憑歸夢付東流

哭陳高州

別路同攀春柳條聞君秋駐海南輶書來自嘉州無瘴

運去那知鬼作妖子建詩雄空蓋世宗元謫死不還朝  
黃梅嶺外鉤輞雨零落殘魂誰與招

遊焦山寺

長江薄海怒相持孤柱中流一控之萬折波濤成汗漫  
六沙煙樹起參差斬榛下弔胎仙塚懷糈來參聘士祠  
兩隻餓眸饑未飽老僧休怪不題詩

遊虎丘寺

古寺春山載酒誰姑蘇太守好襟期振衣盤石虎先去

濯足劒池龍未知千頃白雲孤閣迥一方明月舊亭欹  
憑欄俯弔長洲苑寒食江村細雨時

汝脩北行約過溧上既聞自京口渡江而去為  
之悵然及予將至京師喜佳會不遠往往形  
諸夢寐賦此寄之

江樹春雲久繫思秋杯准擬共君持空傳建業三年論  
却阻毘陵兩日期別後聲名心自愜近來風采夢先知  
華燈若為行人卜應向沙頭訪楫師

遊金山寺

巨靈怒擘大江開割取崑崙一股來萬馬潮頭嘶入海  
片金波西湧成堆峰巒影落浮杯渡天水光涵說法臺  
造化設奇當要會虛傳清解有蓬萊

不睡

耿耿燈前語愁來且就眠如何孤枕上輾轉劇燈前

吳少宰東莊菱濠

誰家木蘭船濠上採菱角日暮唱歌歸天寒秋水落

古意二首

莫作河中水願為水上舟舟行有返棹水去無迴流

其二

蜘蛛結網疎春蠛成密織密織不上身網疎常得食

古詞二首

妾淚如長江不灑陌上塵留取雙轍跡得認君車輪

其二

君行轍不返妾淚長在眼試將眼中痕與轍較深淺

謁嚴先生祠

遠來物色知交態老作漁夫亦帝仁莫道孤高真絕世  
平生朋友與君臣

惜梅

獨樹牆西老更繁幾回相伴月黃昏東風只為芳菲計  
不道飛花已滿園

次韻答蘇廷平

百五又當寒食邊黃風濶浪滯歸船去年細雨梨花外

記得江南中酒眠

次韻王袁州

獨抱餘醒似病眠  
急呼三百舊青錢  
綠楊影裏蕭蕭雨  
望斷同時載酒船

次韻陰僉憲夢遊桃源

盡說仙源隔片塵  
誰知枕上是通津  
武陵太守無仙骨  
只見桃花不見人

其二

仙家服食舊通神  
不信人間有古人  
前夜夢中如借問  
紛紛又過幾亡秦

便面

竹裏幽亭是我家  
門前白水浸平沙  
釣船順放中流下  
袖手船頭看浪花

胡馬圖

夜醉葡萄倚壁眠  
眼中胡騎忽翩然  
誰知慘淡寒綃裏  
中有黃榆萬里天

船上謠

千艘飛過石頭城，獵獵黃旗發鼓聲。  
中使面前傳令急，

江南十月進香橙

書所見

水明煙碧萬條絲，短岸斜風晚更吹。  
紅面小奴牽白馬，為誰來繫斷腸枝。

見素小畫次西潭韻

素公作詩故奇特，石鼓聱牙字難讀。  
素公作畫如作詩，

峭石挿天松壓屋

項進士便面

天光低碧暮寒浮  
峰色紆青晚入樓  
長憶清秋過上空  
歸來明月滿湖頭

次韻范寧國戲荅林憲長索酒

六年南海逐流萍  
不見天邊舊酒星  
聞道澄江皆鴨綠  
敬亭那放謝公醒

次韻吳諭德先生共月菴賞花

城市看春總未真，縱無車馬亦紅塵。  
醉翁獨有閒風味，管領東園樹底春。

其二

未從花下醉清曛，忽憶東風動萬裙。  
已按公詩知節候，來年相訪在春分。

柳中書山水小景次王修撰韻

永嘉山水秀成堆，曾憶前年訪舊來。  
何處最牽東閣夢，一林松影覆春苔。

次韻答李拏之二首

昨夜追歡一闋堂  
醉歸山月已無光  
朝來中酒無人問  
卧聽春鶯不下床

其二

榦柂爐頭擁薄綿  
嫩寒微雨暮春天  
不知詩思能多少  
榆葉梨花已滿前

石倉歷代詩選卷四百二十五